

豫章叢書

第廿二册

江南野史

丁卯冬月
于南昌復廬

欽定四庫全書總目卷六十六

史部

江南野史十卷

江蘇巡撫
採進本

宋龍衮撰衮爵里未詳其書皆記南唐事用紀傳之體而不立紀傳之名如陳壽之志吳蜀第一卷爲先主昇第二卷爲嗣主璟第三卷爲後主煜而附以宜春王從謙及小周后第四卷以下載宋齊邱以下僅三十人陳陶孟賓于諸人有傳而查文徽韓熙載諸人乃悉不載考鄭樵通志略載此書原二十卷此本闕十卷晁公武讀書志載此書凡八十四傳而此本闕五十傳

殆輾轉傳寫佚脫其半錢曾讀書敏求記亦作
十卷則明以來已無完本不自今始也曾稱其
行文贍雅今觀諸傳皆敘次冗雜頗乖史體陳
振孫書錄解題載無名氏江南餘載序排詆此
書頗甚是當時已譏其疎黃朝英靖康緇素雜
記摘其敘江爲世系與史不符又摘其記伶人
李家明苑中詠牛及皖公山兩詩與楊億談苑
所記王感化對嗣主李璟事姓名時代互異又
摘其記家明對嗣主兩懼抽稅事與南唐近事
以爲申漸高事者亦復牴牾王楙野客叢書摘

其記陳陶仙去而曹松方干皆有哭陶詩是傳
聞異詞亦所不免然其中如孫晟林文肇諸傳
與五代史頗有異同可資考證馬陸二書亦多
採之流傳既久固亦未可廢焉

江南野史目錄

卷一

先主

卷二以

嗣主

卷三

後主

宜春王

卷四

宋齊邱

卷五

孫思
劉仁瞻

陳誨
鍾謨

朱元

卷六

彭昌
尹琳

彭圩
陳貺

沈彬

卷七

陳省躬
周彬

孫魴
鄧洵美

李家明

卷八

江夢孫

陳陶

史虛白

孟賓于

孟貫

江爲

卷九

汪台符

張翊

胡元龜

林仁肇

劉洞

卷十

盧絳

朱令寶

申屠令堅

劉茂忠

江南野史卷一

宋 螺川龍 袞 撰

先主

江南先主姓李名昇字正倫其先唐憲宗之子建王
恪之後祖志授署爲徐州判官卒於任所父榮有器
度不事產業每交結豪傑以任俠爲事屬時離亂羣
盜蜂起朱梁統制天下而楊行密專踞淮南榮乃感
憤欲圖興復之志然無少康一旅之衆數十里之地
久之聞海賊夏韶舉甚盛欲因之以成大事旣往而
說韶曰僕大唐之後少失怙恃遭世多難先祖基業

蕩然橫流爲人所有自料以高祖太宗之遺德宗祧
社稷必未杜絕其間子孫必有興者吾雖不調夙蘊
壯志聞公英雄士卒勇勁吾欲因公立事共取富貴
苟成霸業古賢魚水未足爲喻韶感其言於是從之
遂率衆自海入淮轉掠沿岸郡邑至濠梁間衆至數
千人軍勢頗盛郡邑與戰多爲所敗行密聞之因帥
師攻之數敗乃爲所擒因捕其家盡誅之時先主方
數歲且異常兒濠上一桑門與行密有故乞收養以
爲徒弟後行密大將徐溫出師濠上見先主方賴豐
頤隆上短下乃攜歸爲己子先主雖少而天性穎悟

風敦子道朝夕起居溫清左右承顏侍膳迥若成人
及遇溫戚屬皆能俯躬迎奉溫婦見之亦頗鍾愛撫
養無異逮十餘歲溫知其必能幹事遂試之以家務
令主領之自是溫家生計食邑采地夏秋所入及月
俸料或頒賜物段出納府廩雖有專吏主職然能於
晦朔總其支費存留自縉正之數無不知其多少及
四時伏臘薦祀牲醑饌肴蒸賓客從吏之費概量
皆中其度逮嬪婢嬖姦寒燠衣御紈綺幣帛高下之
等皆取其給家人之屬且亡間言溫之嫡子皆好騁
田獵先主惟習書計暇則肆射所志必精遂用徐姓

名知誥既長溫爲娶其婦亦能奉蘋藻致柔順之美
溫嘗卧疾惟先主躬侍左右至於糞溺皆親執器動
至連月踰時扶掖出入或通宵達曙曾不解帶或夜
聞警欬乃率婦同往者數四溫於幃間聞人至則問
曰汝爲誰耶對曰知誥在斯又問曰彼更何人對曰
知誥之婦溫見其篤於孝養而復能幹家知非常品
而諸子難及乃曰吁汝雖異族然吾無親疎先主聞
之侍衛愈謹未幾溫起先主婦卒溫知其篤孝爲之
感歎久之溫指侍右一姬謂先主曰此必有福自歸
吾家而門戶長益不啻數倍汝可婦之奉汝箕箒遂

生嗣主及諸王後溫凡出征討而疑其帳下故先主
常得奉侍遂習熟武事因能騎射起家爲偏將會宣
州叛亂時溫已秉軍政遂命大將柴再用討之以先
主監軍事既至乃率部下先擊之賊平先主功居最
遷昇州刺史時諸郡皆以兵甲爲務而先主專尙文
儒延納多士未幾會親信饒洞天薦南昌人宋齊邱
一見與語終日館於門下朝夕諸訪政治齊邱遂說
宣頒布六條以率羣吏定民科制勸課農桑薄征輕
賦禁止非徭在位十餘年民庶豐實郡邑安堵律禮
修舉庶位公廉城郭濬固軍器充積兵士輯睦人樂

爲用義父溫聞其完葺乃以嫡子知訓居廣陵輔政
來自領之遂移先主刺守京口未逾期而知訓爲大
將朱瑾所殺初知訓秉政朝廷譽之爲昌華相公因
是輕肆驕傲辟命卿相鎮戍藩翰多所不道瑾頗銜
之瑾爲人悍毅勇敢決烈獨任唐末屬朱梁篡逆瑾
爲郡守拒命不從梁師屢征不克會其兄珙以別郡
先降梁祖親討瑾乃遣珙於城下諭令歸順瑾大怒
乃僞開壁請與兄面語遂飛刃刺殺珙梁祖惋歎攻
圍愈急遂亡歸淮南時人壯之呼其小字爲朱憨哥
瑾旣殺知訓乃持其首詣吳主主曰他有父在非孤

敢聞卿善自爲謀瑾乃大呼於市朝因欲作亂時無
附之者遂自剄先主乃率部下渡江以定亂瑾已死
吳主遂委政先主遷左僕射參政握兵權軍國之事
莫不已出越人寇毗陵先主以府兵拒之大戰於無
錫越人奔潰鄰境之內惟錢氏爲仇因是與之和好
兵甲遂弭乃傾意折節奉上接下禮待將校推其慈
惠致之腹心以寬簡優柔存恤驍勇夙將元寮素所
跋扈者無不樂從互與歡飲士民富實桴鼓不聞朝
廷顧綱以禮振舉上下旣久遠邇樂推呼之爲政事
僕射大江南北封境之間二十餘年治平如砥乃治